

Kerwered

2022

Ohfang

Hallo un Gundach ihr lieve Reerer Leid,
no 3 Johr isses endlich soweit.
Die Reerer Kerb is jetzt widder im Renne,
also zeigend allegar mo was ner so kenne.

Ich ruf Eich uf ihr Reerer Mäd un Buwe,
lang genuch hanner dehäm gehockt in eire dunkle Stube.
Erhebend Eich mo allegar von eire Plätze,
mir singe jetzt zusamme kräftisch e schä Lied, dann kenne ner Eich widder setze.

[“Die Reerer Kerb, die Reerer Kerb, die Reerer Kerb is do,
was sin die Leit so froh es sin noch Schoppe do.”]
Schä, dass ner all so gut mitgemach han,
zur Krönung zeigt uns jetzt unser Mundschenk Hasso, was er so kann.

Ach ihr Leit, was soll ich Eich dann Luschdisches verzehle,
wo mer uns all doch schon üwwer zwää Johr mit dem Corona do rum quele.
Das Wort mit “C” kann werklich Känner mehr heere,
jede Dach wolle uns die Medie was Neies üwwer das Thema lehre.

Dezu komme die Affepocke un weitere schlimme Zustänn uf unsrer Welt,
die uns dauernd wärre von üwwerall her gemeld.
Ze lache is uns eigentlich nimmi so se mude,
doch es bringt alles nix...mir wolle weider glawe ans Gude.

Un ma kann’s net glawe, es is endlich widder so richtisch Kerb,
das werd gefeiert, bevor ich Eich do noch mit meine Anfangsworde die Stimmung verderb.
Ganze 1068 Tage hammer uf unser geiles Feschd gewart,
einischer Alkohol blieb unsrer Läwwer in der Zeit erspart.

Ich kann’s net fasse, dass do unner mir jetzt widder alles steht,
Ständcher, Musik un wie es ganze Wochenenn die Poschd abgeht.
Desweje wärr ich Eich jetzt was berichte zum Lache,
von de Reerer un ihre dollschde Geschichde un Sache.

Un ach die Musik spielt endlich widder unsrer Kerb zu ehr,
ach Gott, is es ledschde mo schon so lang her!

Un jetzt kreische mir mim Hasso emol laut,
dass es Eich alle do unne ufm Kerweplatz die Ohre eweg haut.

Verfolgungsjagd

Im ledschde Johr do ging's heiß her,
mit dene Coronaleugner un Quarantänegeflüchtete hot's die Polizei eh schon
schwer.

Dann kam do noch e Reerer Verkehrssünder dezu,
was do genau war, verzehl ich Eich im Nu.

Sommer war's un häß wie immer,
do hotte zwo Polizischde von ihrem Middach noch gar kä Schimmer.
Uf Streife warn se im Umland von Roth gewes,
de junge Polizischd is Audo gefahr un de Alte hat die Rheinpfalz geles.

Von Offebach do hinne no Esswiller sin se gefahr
un han die Hitz in ihrem klimatisierte blau-weiße VW-Passat ganz gut ertrah.
Hinner Hinzwiller han se die Kurv mit e bissje Tempo genomm,
awwer uf ämö is ne de Wilking Hartmut mim Traktor vor die Flinte gefahr komm.

Riese Heuballe hot er ufm Hänger schon gelad,
wenn er die vorm nächste Rā net hām kriehn würd, wār schad.
De wohlverdiente Feierowend hat er schon komme gesieh,
er bringt nur noch schnell die Balle hām fer sei Vieh.

Rischdung Hof fahrt er an de Sprengelbursch vorbei,
do wackeln se hinne schon, die gude Balle Hei.
De Polizischde is das e Dorn im Au,
das gefällt ne gar net dene Zwo in Blau.

Im Blick han se alles behall durch die Eßwillerer Gasse,
die Beide han sich net vom Hartmut abschütteln lasse.
Ihr wisse jo was der fer e Tempo fahre kann,
awwer die Polizei war ohne Probleme hinnedran.

Gesucht han se no nem Manko, wo es Bußgeld hochtreibt,
dass es Land do net uff seine Spritkoschde von de Polizei hocke bleibt.
De Hartmut hat de Ernschd der Lage net gesieh
"Die paar Problemscher an meim Gefährt merke die Polizischde doch nie.
Die sin bestimm nur ins Lauderdal unnerwegs, un wärre mir do net weider gehe uf
de Keks."

Awwer die Beide warn schon uf de Lauer un warde schon länger,
wo de Hartmut rinfährt mit seinem waggelische Anhänger.
Uf de Blinker vom Hartmut achten se do noch ganz genau, sie sin doch kä Deppe,
wenn der gabutt is, kenne se dofor noch zusätzlich Geld abkneppe.

De Hartmut gebt alles un peitscht de Träcker bis uf die Acht enuf,
er sieht, dass die Polizischde ihm immernoch hänge dicht hinne druf.
De Hartmut is also ufm Hof vorm Polizeiaudo zum Stehe komm
un hat sich beim Aussteihe noch was zum Bedecke von seinem blanke Adoniskörper
mitgenomm.

“Gundach sehr geehrte Herr Polizischde, was is dann los?
Ich hat doch kä Unfall un bin ah nirgends drangestoß”
“Gundach der Herr...hole Sie uns bitte erschdmo ihre Führerschein raus”,
saht de junge Beamte un hat glei schon sei Notizblock draus.

“Herr Wilking, mir han do e paar Sache erkannt,
uf ihr Erklärung simmer schon ganz gespannt.
Die Balle wackeln ziemlich stark do hinne ufm Hänger,
das mit der Ladungssicherung wisse Sie doch sicher schon länger.
Außerdem han Sie kä Nummernschild an ihrem Gefährt,
das is ebbes, was mich werklich arisch stert.
Zusätzlich derfe Sie nur 25 fahre uf de Stroß,
das ware awwer locker 50 un das mit dene Balle, die sin los!
E Schild gehert do hinne druf, das üwwer die 25 km/h informiert,
ach, wenn Sie die Geschwindigkeit eh net interessiert.
Un jetzt komme mer zu dem nächschde dreißte Fakt,
dass Sie vor nem Polizeiaudo net blinke, hat bei mir ah noch kanner gepackt.”

“Äh, Moment emo, Herr Polizischd,
das mit der Ladungssicherung stimmt, awwer das mim Blinker sicher nicht.”
Das mit de Ladungssicherung muschd sich de Hartmut also zu Herze nemme,
do gab's kä Wesch, wie er sich hät rauswinne könne.

Es blede is awwer, dass die Polizei ach Blinke kann
un komischerweise genau dann, als de Hartmut hat mim Blinker fer in die Acht enin
angefang.

Das kann also net sin, dass es Hartmut sei Blinker is gabutt;
der Vorwurf kam em ufmerksame Hartmut do ganz sicher net in die Tutt.

De alte Polizischd hot uf dene Quatsch do wenisch Luscd,
awwer de Jung hat do gestann wie de Chef mit erhobener Bruscd.
De Hartmut war nur mäßisch begeischdert von dene Vorwürfe,
immerhin sin das Sache die alle Baure so dürfe.

Dann hatter dem junge Kerl mo erklärt, was Sache is
un, dass er jetzt ufhere kann mit dem unnedische Geschiss.

“Jetzt muss ich ah noch die Polizei belehre,

efach e Frechhät, dass die mich in meinem wohlverdiente Feierowend stere.

De Hartmut hot dann noch e bissje Huddel un konnt mim Anwalt e mildie Summe
rausschlahn,

do war de Sprit deirer fer die Polizei bei dem ganze Hin un Her fahrn.

Die Musik spielt dene zwo Beamte ze ehr,
machend Eich es Läwe doch net so schwer!

Zeitumstellung

An Halloween 2021 do gabs ach was se lache,
ihr glawe net, was de Weber treibt fer witzische Sache.
E diesischer Sonndach war's im Reerer Land,
üwwerall war schon die groß Feier im Reimschelager bekannt.

Um Sibbe geht's los, steht dick un fett ufm Plakat,
mir han gedenkt do sin dann ach alle von de Straußjugend pünktlich um 8 parat.
Mim Uffbaue warn die Bube und Mäd schon e paar Dach voll im Stress
un han bei de Planung trotzdem die Hälf vergess.

Bis zur ledschd Minud wurd viel im Lager umgestellt,
also die Jugend hat ah schon müsse was schaffe fer ihr Geld.
Die Kellertrepp im Reimschelager hammer dann ah noch ufgeriss
un de Lade do unnerm Reimsche zum Partyraum umgeschmiss.

Als Generalprob han die Helfer am Owend vorher schon vor de Bühn gehockt,
zusamme wurd sich mit Bier schon kräfdisch ausgenoggt.
Ä Pils nohm annere is in de Kopp eninn gefall,
do hat kä Bäh mehr näwerm annere gehall.

Un plötzlich kam's, alle wollte grad hämgehe so schä,
umgestellt war die Uhr von drei widder uf zwä.
De Dach dennoh ging dann ach schnell erum,
Gott sei Dank is nommo Bier fer die Party owends komm.

De Schaffer ihr Kopp hat vom Alkohol am Owend devor noch geknallt,
awwer die erschde Gäscht, die komme jetzt ah schon bald.
Ganz vorne an de Spitz de Heiko im Sprint,
do gebt's Karlsbersch, das is dort, wo mer gere find.

De feschde Überzeugung es wär kurz vor 7, do laft er los
un packt sich schon glei seine Geldbeidel in die Hos.
De ganze Dach is im Weber seiner Garag noch kä Betzespiel gelof, wo er hät kenne
die Uhrzeit siehn,
wie hätter dann ah sonschd solle die Zeitumstellung mitkriehn.

Ankomm an de Kreuzung konnt er es Bier schon von Weitem schnüffele,
endlich kann er glei sei Karlsbersch süffele.
Awwer im Mitteldorf gestan, do konnt er's gar net fasse,
er hat nur gesieh e komplett leerie Gasse.

Gedenkt hat er sich: "Rinknalle kann ich mer do glei so einisches mit de Bierflat, awwer, dass do weit un breit noch kä enner do is, das versteh ich net. Mist, ich glab die Party is doch net heit, die hät mir doch so gut gefall, awwer wie wär's, wenn ich jetzt erschdmo die Nerve behall.

Trut, Trut, Trut, was is dann do faul?
Bevor ich jetzt allä fer mich do ufm Platz erum mau." Do flieht em Weber schon vom Tapio e Spruch an de Kopp:
"Ey Weber, dass du schon do bisch zum Hilfe fin ich top!
Der Quatsch do fängt doch erschd an in ner Stun, frieher gebt's ah kä Bier, das wäsche schun?!"

De Heiko rafft net, was de Tapio do mähnt, er wollt nur schnell rin, ihm hat's bei dem Sauwetter in de Nagge gerähnt.
"Häh, ich wollt uf die Party gehe un net do draus allä rum stehe!
Wo sin dann die all, do is jo kä Sau, awwer vielleicht nämmen's die Leit ach einfach net so mit de Uhrzeit genau."

6 Uhr war's awwer in Roth erschd no Europäischer Winterzeit, außer in de Eßwiller Stroß, do war'n die Uhre noch e bissje zu weit. Die neimodische Geräte, die sin schon e Wunner, die schaffe der die Stunn sogar von allä enunner.

De Weber scheint wohl so e selbschdstännisches Teil net zu besitze, den han sei Uhre nämlich im Unwissende geloss sitze. Im Eiltempo isser widder häm un hat noch schnell e Ei geleht un hat dennoch die Zeite uf seine Uhre rischdisch gedreht.

Die Musik spielt em Heiko Weber ze ehr, wenn die Zeitumstellung doch endlich mol abgeschafft wär.

Parre vor verschlossener Deer

Vor e paar Johr, do kamer zu uns ins Reerer Land,
weil bei uns kammer jo erläwe so allerhand.
Nohm alde Müller hammer e neier Müller griecht,
dass es in de Kersch sonndachs net so leer ohne Parrer aussieht.

Offiziell verbeamtet wurd er dann no zwä Johr,
hat awwer bis jetzt noch nix von seiner Motivation verlohr.
Bei ner große Feier noh ewisch langer Zeit,
hat er sich endlich uf seine erschde Dach als beamter Parre gefreit.

E schänie Party hat mer geplant fer dene Mann,
weil mer jo ach wisse, wie viel er trinke kann.
Geehrt wurd er mehrfach an dem große Event,
de heilische Mathias hat ma ne ab dann genennt.
Zum Bischof von Roth han se ne bestimm ah noch gekröhnt
un mit allerlei schene Geschenke verwöhnt.

Vor de Fete hat die Kathrin die Hausdeer noch schnell zugeschloss
un kä unerwünschder Besuch ins heilische Parrhaus ringeloss.
Die Zeit ging schnell erum bei dem ganze Trubel um den Mann
un ihr glawe gar net, was ma an so nem gesellige Herbstddach alles trinke kann.

Schneller als er gugge konnt, wurde die Getränke knapp
“Gut, dass ich drin noch e paar Ersatzkaschde hab.”
Uf die heilisch Deer vom Parrhaus is de Mathias zugeschoss,
“Gott sei Dank han ich ach de Schnapper dringeloss.”

Angeschlah hat er sich an de Hausdeer awwer plötzlich seine Zinke,
Hauptsach de Gäscht von Weitem freundlich winke.
Die derfe jo kä Verdacht schöpfe, dass die Deer war dicht,
ach, wenn's grad ziemlich weh dud im Gesicht.

“Au, mei Kopp, de Schnapper is doch net drin,
dann geh ich halt efach mim Schlüssel enin.”
Gesucht hat er dann nohm Schlüssel in seinem kerchliche Rock,
do hat ne dann direkt getroff, de ernüschdernde Schock.

Hektisch in seine Dasche rumkrusche han ne die Gäscht von Weitem gesieh,
“Wo han ich dann nur dene Schlüssel geschafft jetzt hie?
Noch nie is mir de Schlüssel abhande komm fer das Haus,
außer naderlich heit Owend, wo ich steh vor alle Leid do drauß.”

Grad wollt de Mathias frohn, ob ihm enner helfe kann,
war ach schon zur Stell de Präsbyter Ortmann.

“Ich bin doch de Panzerknacker Ortmann,
gugg mo wie schnell ich das Schloss do knacke kann.”

Gerüttelt, geruckelt, gehebelt un gedrickt,
awwer net ä Meder hat sich die Deer von de Stell verrickt.
Gezerrt han die zwo Helde mit aller Kraft,
awwer die Beide han’s efach net geschafft.

De Ortmann gedenkt: “Das mit dem Knacke hab ich mer leichter vorgestellt,
wär ich mo lieber unner de Gäscht blibb un net do zum Parre vorgeschneilt.”
Selbschd Gebete han do scheinbar nix meh gebrung,
zu Zwot han se sich immer weider un weider fescht gehe die Hausdeer geschwung.

Awwer ich glab uf ämo war de Herrgott von dem traurische Anblick entsetzt,
so hat er em Ortmann e schlaue Idee in de Kopp gesetzt.
Es Gummi hat er ausm Dierrahme griet gezoh
un dennoch noch die Deer e bissje weider verboh.

“Klack” hat’s endlich gemacht un es Hausdeerschloss ging uf,
awwer ihr glawen’s net...hinner de Ingangsdeer konnt er dann gugge uf seine Garde
druf.

Die Terrassedeer hat de Mathias mojens vergess zuzemache,
do konnten se sich beide ball nimmi halle vor lache.

Mir alle wisse, was mer an unserm Parre han,
unner annerem, weil er mit uns alles erprobt, was mer so trinke kann.

Die Musik spielt em Mathias e Lied,
hoffe mer, dass er in Zukunft die offen Gardedeer ach sieht.

Inbruch bei Nacht

Ihr lieve Leit, ich hoff ihr han mir bei dem Thema vorher gut zugeheert,
was Ähnliches is innerhalb von äm Jahr im Dorf nämlich nochmo baseert.
Domit hammer zwä Inbrich in Roth am eigene Grundstück zu verzeichne,
sowas muss ma sich ach erschdmo traue seiner Versicherung zu beischde.
Ufgebasst, ich erzähl Eich jetzt ah die zwot Geschid genauer,
hinnerher sinner dann ach endlich schlauer.

“Ein Haschkeks macht noch keinen Sommer” wurd beim Theater ufgeführt,
denoh hat jeder Gaschd sei Lachmuschgeln drei mo gespürt.
An de Thek gab’s gut was zu trinke un jeder wurd versorschd,
awwer die Hildemann’s, die hatte im Anschluss ans Theater immernoch Dorschd.

Deshalb han se gar net lang gefackelt
un die ganz Family is bei de Nina un em Marco noch mit uf die Terrass gedaggelt.
Die Ursel, de Herold, die Nina un de Marco han sich’s draus schommo bequem
hiegehockt,
do hat em Delle sei Biernos ne schon in de Bierkeller gelockt.

“Die Deer is jo e Spalt uf”, hat sich de Delle gefräht,
“Hopp, ich trink noch Zwä, es is jo noch net so spät.”
Fer die Annere hatter ah noch e paar Pils mitgenomm,
die Deer hinner sich zugezoh un is aus’m Keller rauskomm.

Es Bier ufgeriss un leer gemach, die Flasch noch am Mund,
Zeit war’s schon fer die zwot Rund.
Diesmo war die Nina mit Bierhole dran,
do muschd se feschstelle, dass se die Deer nimmi ufmache kann.

“Och Delle, Neee, was hasche dann geduh?
Jetzt is de Deerspalt do jo zu.
Den hammer doch extra fers Trinke noch ufgeloss,
jetzt hasch du die Deer beim Rausgehe ganz feschd verschloss.
Ursel, du hasch doch e Ersatzschlüssel dehäm,
machsche dich bitte uf de Wesch un holsch ne, das wär schön.”

Die Ursel schnell hoch zu ihrem Haus,
langsam wurd’s ah e bissje frisch fer alle draus.
Alles hat die Ursel in de Bud vergeblich durchsucht,
de Ersatzschlüssel war weg...ach...verflucht!

Ohne Schlüssel hat die Ursel dann zu de Annere zerickkomme misse,
in de Scheier muss ingebroch wärre, weil se sich nimmi annersch ze helfe wisse.
Anfang han se mit nem komplexe Plan,
üwwer's Fallrohr bis zum Dach un dann noch hinnedrahn.

Gut, zugebb, der echte Plan war net ganz so schwierig,
es Scheierfenschder freigemach un äänner durchgeschickt, wo is zierlich.
De Delle, wen ach sunschd, wollten se dann do durch's Fenschder schicke;
mit e paar sportliche Beweschunge könnt er sich vielleicht ah werklich erfolgreich
durchdrigge.

An dem Fenschder is e Gitter dran,
wenn dann jetzt äänner do wär mit Muschgeln wie e Mann.
De Marco muschd das Gitter do verbiege,
bis sich de Delle kann in das entstannene Loch enin schmiege.

Mit voller Kraft packt de Marco das Metallgitter an,
uf isses, do sieht mehr mo, was Fahrradsport ach beim Bizeps ausrichte kann!
Im Anschluss hat sich de Dennis e Wesch durch's Fenschder gesucht,
"Aua" hier, "Kacke", do, un alles Mögliche hat er noch geflucht.

Es linke Bä hat er hinner's rechte Ohr geklemmt,
de Daume in de Nagge un mit zwä Finger es Gewicht vom Gitter gestemmt.
Wem Twister was saht, das war e Witz im Vergleich zum Dennis Hildemann,
gehe den will kenner spiele, bei dene Verrenkunge, die er kann.

Durch's Haus is de Dennis dann gestolpert bei geringer Sicht,
fer Maulwürfe isses bekanntlich ach gut zu ertrahn mit wenisch Licht.
Schief hat se widder gehong die Brill beim Delle ufm Gesischd,
das war dann ah schon es End von der Geschischd.

Die Musik spielt de Familie Hildemann e Lied,
kä Jahr wo mer von Eich nix fer die Kerwered ze here kriecht.

De verlorene Milchmann

Ihr Reerer Leid, ihr wisse's jo schon,
no langer Zeit hat mer sich mo üwwerwunn.
Unser Hauptstroß in Roth hat de LBM fer Baumaßnahme voll gesperrt,
das hat ach e Zeit lang an unsere Nerve gezerrt.

Geteert hat mer die Stroß noh Johre mol endlich,
das war bei dem Geruckel ach sehr verständlich.
Zwar nur zum Däl un net am Stick,
awwer wenigschdens e bissje, was e Glick.
Ruckeln dud's zwar immernoch gewaldisch an manche Stelle,
awwer annersch ging's wohl net uf die Schnelle.

Von de Sperrung betroff warn mer jo all,
sogar de Sebbi hinne bei seinem große Stall.
Mittlerweile sin das schon zwä schnäne Ställ, vollautomatisiert,
do kriehn die Kieh beim Abbumbe noch e warmer Tee un de Euter massiert.

Genuch Kieh sin das bestimm fer mehrere dausend Liter weißie Brieh,
sowas han mir Reerer in der Form ah noch net in Roth gesieh.
Gehol werd die Milch dann vom Milchmann mehrfach in de Woch,
der is jetzt ach schon oft mim Hänger in die Acht enin gestoch.

Geiebt isser dodrin un kenne dud er de Wesch mittlerweile genau,
awwer während der Baustell hat's ne ball aus de Socke enaus gehau.
Sei alt bekanntie Route war uf ämo dicht gemach,
ausgeschildert hat's LBM dann üwwer Wolfschde bis no Aschbach, vier mo links,
drei mo rechts un ah noch durch das dreckige Geddebach.

“Do fahr ich net lang, do werd mei Milch jo sauer
un Bock han ich uf den Umwesch ah net uf Dauer!”
Geholpert isser dann ins Neibaugebiet enin wie dumm,
das hat em es GPS-Navi wohl richtisch übel genumm.

Weider durch de Kreisel un ab direkt zum Stall,
bloß hat er bei de Gawelung vom Schmetterlingspfad net mo angehall.
De Bersch enuf Rischdung Fluchplatz isser getourt,
awwer als de Wesch dann dreckisch wurd,
hatter nimmi gewuschd wo anne,
üwwerall war'n hohe Bäm un große Tanne.

“Wo geht’s dann noch lang? Wie komm ich do jetzt hie?
Es ledschd han ich doch noch e Wesch beim Sebbi seinem Hof gesieh.
De Wesch weider nuf, das klingt no nem sinnvolle Schritt”,
hat sich de Milchmann gedenkt, kurz bevor er ufs Gaspedal tritt.

Steuern dud er dann uf de Selberschturm zu,
kä Ahnung vom Wesch, awwer vielleicht gebt’s dort e Kuh.
Gerührt, net geschüttelt, das wollt die Milch eigentlich liewer han,
das hat an dem Dach awwer net interessiert, de junge Milchmann.

De Bersch enuf, die Maschin gequält,
do hat’s em langsam es Profil von de Reife geschält.
Am Flugplatz vorbei un ab enin in de Wald,
nur scheisse, wenn in dem Moment es GPS komplett ausfällt.

Egal, wo er guggt, üwwerall sin Bäm,
“Links odder rechts? Wie komm ich jetzt häm?”
Bei jeder Gawwelung muschd er sich nei orientiere,
hat’s awwer naderlich erfolgreich geschafft de Üwwerblick zu verliere.

E paar mo hatter die Milch im Kreis gelenkt
un dodebei e paar günsdische Lidder Sprit verschenkt.
Nohm vierte Mo, do war’s dann soweit,
es Grinse beim Sebbi war richtisch breit.
Sei Delefon hat nämlich geklingelt un wer war dran?
Ihr ahne’s schon...de verlorene Milchmann!

Orientierungslos un mit e Haufe Fruschk,
hat er de Wesch zum Sebbi jetzt gar nimmi gewuschd.
Ganz owwe ufm Bersch hatter gestann
un war froh, dass er de Sebbi hat griecht an’s Telefon dran.

Der muschd dann de Hartmut schicke uf die Gibb enuf,
als “Retter in der Not” hat der’s schon ganz schä druf.
De Hartmut hat dann dene Milchmann gelenkt widder uf die richdisch Bahn,
sodass der kann endlich mit seiner Milch zum Sebbi fahrn.

Die Musik spielt em Milchmann e Lied,
hoffe mer, dass er irgendwann emol e Reerer-Navi kriecht.

Scherwe bringe Glick

Ach unser jüngschdes Brautpaar, die Denise un de Paddy, komme net devun
un han mit ner kläne Story zum Schluss ihre Wesch in die Kerwered gefun.
Vor äner Woch han sich die Zwä getraut,
die han sich seit 10 Jahr ganz verliebt in die Aue geschaut.

An der Stell nochmo herzliche Glückwunsch von de Straußjugend an Euch beide,
mir würde uns frähe, wenn mer kenne das Glick noch lang begleite.

Doch die eigentlich Geschichd, wo ich Eich erzähle will, kommt jetzt,
also jetzt mo Ruh do hinne uf de billische Plätz.
Vor zwo Woche war de Polterowend owwe vor de Hall,
bei der Getränkebestellung han die Leid gedenkt: "De Paddy hat e Knall."

420 Liter flüssisches Gold han se bestellt do nuf,
dodezu komme noch 150 Liter im Eigenheim owwedruf.
Zu Esse han se ach Einisches ufgetischt
un naderlich wurd die rekordverdäschdisch Menge Alkohol ah vernischt.

Ordentlich Porzellan wurd ach uf de Bode gefeuert,
es zukünftisch Brautpaar hat sich bestimmt gedenkt: "Die sin doch bescheuert."
Die Gäscht han die Zwo ordentlich gequält,
denn de Porzellanhaufe wurd öfter üwwer de ganze Platz verdählt.

Selbschd die anwesende Kinner ware fleisich,
die han sich gedenkt: "Es noch so kläne Stick Porzellan..., das schmeiß ich!"
Scherbe von Teller un Tasse han se gefun im ganze Dorf,
die han die Buwe mit voller Kraft nochmo uf de Platz oder weit in die Höh geworf.

Immer höher un immer weider sin die Sticker geklatscht
un plötzlich hat's in de Treppescheib von de Hall gebatscht.
Im Muffe sei Sohn, de Lars, hat e Teller geworf mit viel Schwung
un hat dodurch die Scheib zum Platze gebrung.

In dausend Sticker is se zerfall,
do sin e paar rischdisch verschrock von dem Knall.
Muffe, die Rechnung kommt, hat de Paddy gesah,
die Haftpflicht übernemmt den Fall, das is jo ganz klar.

Un jetzt spielt die Musik em Lars e Lied,
dass er ach jo net so arisch gescholl krieht.
Mach dich net verrickt, denn Scherwe bringe Glick.

Schluss

So, das war's dann ah, die Kerwered is jetzt vorbei,
Rainer... komm Du mo do her ewei.

Was sahsch dann du zu unserm schöne Strauß,
der is doch widder toll odder? Hau mo raus!

Danke fer dei liewe Worde,
unser Kerb is ah die schänschd von alle Orte.
Ich beeil mich mo, weil mir is die Brieh am laafe,
de Strauß den wolle mer jetzt schnell daafe.
De Name "Steffi" han mer uns ausgesucht für das prachtvolle Stick,
die Ähnlichkeite vom Kerwetier zu e Paar von de Straußbuwe is echt verrickt.

Zu guter ledschd wolle mer uns noch bedanke bei de Leid,
die e schener Kuche gebackt han fer heit.

Ach de viele freiwillige Helfer beim Ufbau un de Organisation will ich "Danke" sahn,
ohne Eich wär unser Kerb ganz schä armseelisch drahn.
Ach meine fleißische Helfer beim Schreiwe von de Red, em Biedi un em Selli, gilt e
Dank,
bevor ich do von derer Läder erunner wank.

E spezielles Lob, für manche isses bestimmt net so klar,
geht an de Chef von de weltberühmte Fifa.
Der gute Mann denkt ausnahmsweise net nur an Geld un Macht,
sondern hat dies Johr ach an die Reerer Kerb gedacht.

Für die, wo's net wisse, dene du ich's verrote,
alle vier Johr macht der in unser Kerweplanung e großer Knote.
Es Verdunkle vom Zelt bescherte uns immer große Quale,
awwer es Deutschland Spiel müsse mer efach ausstrahle.

Dies Johr hat er sich was Feines üwwerleht
un hat die Fußball WM doch tatsächlich in de Winter geleht.
Fußballspiele gibt's dies Johr an de Kerb zum Glick kä,
de erschde Weltmäschder unnerm Tannebäm, das wär doch schä!

Vom Sport, do kännt ich Eich so einische Legende nenne,
awwer glawend bloß net, dass die mit uns Reerer mithalle kenne.
Miro Klose, Michael Schuhmacher, Phil Taylor un wie die ehemalische Sportler alle
laute,
han ihr Karriere beendet, wie dies Johr ach unser Hasso Knauth.

Fer die wo's net wisse, de Phil Taylor hat gespielt Dart
un de Hasso hert als Mundschenk uf, das is voll schad!
Heit bei seinem ledschde offizielle Spiel, gebührt ihm die Ehre,
awwer, was de Hasso fer Roth un die Straußjugend geleischded hat, das due mer
jetzt klere.

2012 wurd de Hasso vom Rainer fer die Ufrenchterhaltung der Kerwetradition offiziell
vorm Strauß geehrt
un wie ner alle siehn, de Hasso hat sich von do an als Mundschenk noch weitere 10
Johr bewährt.
(Hasso komm mo runner do vor die Läder.)

Lieber Hasso, mir wolle uns recht herzlich bei dir bedanke, du bisch unser
Straußjugendlegende,
schad, dass du dusch dei Job als Mundschenk bei uns beende.
Uf die Läder hochwanke, fällt mittlerweile zu schwer,
mir wisse, dass du nur gebesch arisch zögerlich deine Poschde her.

E klänes Fotoalbum han mer do fer dich gemacht,
zusamme in Erinnerungge schwelge, is doch e schänie Sach.
Als neuer Mundschenk du mer jetzt de Franz hochläwe losse,
komm du mo do näwer mich uf die Lädersprosse.

Mir hoffe, du hasch dodebei deine Spaaß,
also Straußjugend, gebbend jetzt mol richtisch Gas.
De Franz macht jetzt mol ordentlich Krach,
dass mer's heert bis no Geddebach!

Fer de Anfang war's garnet so schlecht,
awwer jetzt wärre mer dem Ganze nochmol richtisch gerecht.
Hasso, duh uns dene Gefalle un loss dei Stimm noch mol für uns alle durch's
Mitteldorf schalle.

Die Musik spielt unsrer Reerer Kerb ze ehr,
die schä Kerb jetzt zu feiern, fällt uns gar net schwer.